

TEZAUUR LITURGIC
2 OCTOMBRIE

ACATISTUL
SF.IERARH-MUCENIC
CIPRIAN,
EPISCOPUL
ANTIOHIEI
PISIDIEI



MOSCOVA, 2000



Акафист

священномученику Киприану

Кондак 1

Избранный от диавольскаго служения на служение истинному Богу и к лику святых сопричтенный, священномучениче Киприане, моли Христа Бога избавитися нам от сетей лукаваго и победити мир, плоть и диавола, да зовем ти:

Радуйся, священномучениче Киприане, скорый помощниче и молитвенниче о душах наших!

Икос 1

Ангельския силы удивишася, како от художества волшебнаго обратился еси, Богомудре Киприане, к познанию Божественному, покаянием обрел еси ангельское безстрастное житие. Мы же, обращению твоему дивящеся, вопием ти таковая:

Радуйся, обращением твоим Ангелов удививый;

Радуйся, лик святых возвеселивый.

Радуйся, мудрость свою показавый;

Радуйся, за Христа венец приявый.

Радуйся, яко тобою беси отгоняются;

Радуйся, яко тобою вся болезни исцеляются.

Радуйся, священномучениче Киприане,
скорый помощниче и молитвенниче о душах
наших!

Кондак 2

Видя Господь, како от лет малых отдан бысть
Киприан нечестивыми родители на обучение
демонскому служению, восхоте обратити его к
Себе, да со Ангелы и всеми святыми воспеваает:
Аллилуиа!

Икос 2

Разум несовершен имея к вышнему
разумению, усердно трудился еси, святе
Киприане, изучая демонския лжехитрости, но,
познав слабость бесовскую, яко тии боятся
Христа, обратился еси к познанию Бога
истиннаго. Темже убо тя величаем:

Радуйся, хитрости демонския препобедивый;

Радуйся, прелесть служения его обличивый.

Радуйся, змия лукаваго посрамивый;

Радуйся, христиан прославивый.

Радуйся, мудрых мира сего мудрейший;

Радуйся, разумных разумнейший.

Радуйся, священномучениче Киприане, скорый помощниче и молитвенниче о душах наших!

Кондак 3

Сила Вышняго просвети ум твой, блаженне Киприане, егда, не успевше в чародействе против Иустины, беси рекоша тебе: мы боимся и трепещем силы Креста, имже отгоняет нас дева Иустина. Ты же отвечал еси: вы Креста боитесь, но Распятый на Кресте сильнее Креста есть. Сего ради пришел еси в храм Господень пети со всеми верными: Аллилуиа!

Икос 3

Имея ум просвещен силою свыше, пришед Киприан к епископу просить крещения, обаче той, убоявся коварства волхва, отгна его. Киприан же тече в храм Господень, и тамо, литургии бывшей, внегда диакон возгласи: оглашенни, изыдите, рече: не изыду из Храма,

дондеже прииму крещение. Мы же, твоему
вразумлению радуящиеся, воспеваем ти таковая:

Радуйся, силою свыше просвещенный;

Радуйся, Господом вразумленный.

Радуйся, силу Креста познавый;

Радуйся, демонов от себя отгнавый.

Радуйся, жизнь свою исправивый;

Радуйся, стопы в Церковь направивый.

Радуйся, священномучениче Киприане,
скорый помощниче и молитвенниче о душах
наших!

Кондак 4

Буря помышлений одержа Киприана, како
приятти ему крещение. Темже убо прежде, взяв
своя чародейския книги, принесе их на средину
града и тамо пожже, поя Богу: Аллилуиа!

Икос 4

Услышав епископ, яко имаши, всемудре,
намерение благое быти христианин, крести тя и
постави чтеца во храме. Сего ради вопием ти:

Радуйся, духов злобы победивый;

Радуйся, чародейския книги попаливый
Радуйся, быти христианин возжелавый;
Радуйся, Святое Крещение приявый.

Радуйся, день и ночь с покаянием к Богу
взывавый;

Радуйся, епископом наставленный и чтецом
во храме поставленный.

Радуйся, священномучениче Киприане,
скорый помощниче и молитвенниче о душах
наших!

Кондак 5

Боготканную одежду Святаго Крещения прияв,
Киприане всехвальне, тепле молился еси Богу о
прощении грехов, прежде совершенных, от всех
христиан воспевая Богу: Аллилуиа!

Икос 5

Видев епископ подвиги и труды твоя,
священномучениче Киприане, пост,
многонощное бдение, коленопреклонение,
покаяние, слезы, молитвы, и по испытании
постави тя во диакона. Мы же, благодаряще
Бога, восхваляем тя:

Радуйся, подвиги и добродетельми
украшивайся;

Радуйся, о прощении грехов моливыйся.

Радуйся, пример исправления показавый;

Радуйся, слезные молитвы Господу
приносивый.

Радуйся, путь ко спасению познавый;

Радуйся, пламенную любовь ко Христу
явивый.

Радуйся, священномучениче Киприане,
скорый помощниче и молитвенниче о душах
наших!

Кондак 6

Образом Благочестия христианского
подражая деде Иустине, священномучениче
Киприане, воистину христианин совершен
явился еси, отклонил бо еси нечестивое учение,
крестився, и усты своими и чистым сердцем
благодарственно воспевал еси Богу: Аллилуиа!

Икос 6

Возсия в сердце твоём свет Божественного
совершенства, Богомудре Киприане, и достигл

еси сана священника, послежде же и епископа.
Молим тя, молитвами твоими просвети и наша
сердца, тепле молящаяся тебе:

Радуйся, в сан епископа посвященный;

Радуйся, на высоту орла вознесенный.

Радуйся, граде, верху годы стояй;

Радуйся, светильниче, пред Богом горяй.

Радуйся, молитвенниче ко Христу
неустанный;

Радуйся, учителю, Богом дарованный.

Радуйся, священномучениче Киприане,
скорый помощниче и молитвенниче о душах
наших!

Кондак 7

Хотя Господь всем спастися, дарова нам сего
молитвенника, заступника и целителя от духов
злобы поднебесныя. Умением бо и словесы
твоими, Богогласе, приводил еси многих к
покаянию и исправлению греховныя жизни,
научая всех пети Богу: Аллилуиа!

Икос 7

Новый мудрейший врач показался еси миру, священномучениче Киприане, яко молитве твоей чародейския козни противостати не могут, абие разрушаются и прогоняются наведения злых человек и лукавых бесов. Мы же, видяще дарованную тебе Божию силу, вопием ти таковая:

Радуйся, волшебных козней разрушителю;

Радуйся, страшных бесов прогонителю.

Радуйся, от негоже дуси злобы, яко дым, исчезают;

Радуйся, тяжкомучимым скоро помогаяй.

Радуйся, от бед и скорбей избавляяй;

Радуйся, страдания в радость обращааяй.

Радуйся, священномучениче Киприане, скорый помощниче и молитвенниче о душах наших!

Кондак 8

Странное чудо является притекающим к тебе с верою, священномучениче Киприане, ибо данною тебе от Бога благодатию беси

изгоняются мучащий человека, больнии же исцеляются, взывающий Богу: Аллилуиа!

Икос 8

Всем сердцем возвысивыйся к Богу, преславне, и всею душою Того возлюбивый, имел еси тщание и желание творити волю Его и, яко пастырь добрый, не отринул еси бедами отягощенных, но предстательствуеши в молитвах пред Богом, даруя нам исцеление и утешение. Сего ради, восхваляюще любовь твою ко Господу, вопием ти сие:

Радуйся, всем сердцем Христа возлюбивый;

Радуйся, вся добродетели стяжавый.

Радуйся, недугующим и разслабленным
вспоможение;

Радуйся, в скорбех и печалех утешение.

Радуйся, наветов и искушений, от мира, плоти и диавола находящих, прогонителю;

Радуйся, всех болезней душевных и телесных
исцелителю.

Радуйся, священномучениче Киприане,
скорый помощниче и молитвенниче о душах
наших!

Кондак 9

Все Ангельское воинство возвеселися, отче, видя тя, воина Царя Небеснаго, непоколебима и со дерзновением проповедующа Христа, егда веден был еси на вечное усечение вкупе с Иустиною. Ты же, болезнуя о ней, да не отречется от Христа, узревши тя усекнута, глагола ей: да усекнут прежде тя. И, преклонивше под меч главы своя, воспеша Богу: Аллилуиа!

Икос 9

Витии многовещаннии не возмогут по достоянию страдания ваша за Христа воспети, яко не убоялися есте прещений лютых, но со светлыми лики предстали есте судилищу цареву, воздвизающе всех верных глаголати вам сицевая:

Радуйтесь, веры Христовы непоколебимии исповедницы;

Радуйтесь, Пресвятая Троицы дерзновеннии проповедницы.

Радуйтесь, за Христа души своя положившии;

Радуйтесь, мучения лютая ни во что же вменивший.

Радуйтесь, яко страдания ваша верными прославляются;

Радуйтесь, яко имена ваша в храмах Божиих величаются.

Радуйся, священномучениче Киприане, скорый помощниче и молитвенниче о душах наших!

Кондак 10

Спасти хотя души всех одержимых нечистыми духи, не престай взывать присно ко Господу, Киприане Богоглагольниче, тебе бо дадеся благодать молиться за ны, да помиловании и очищении, воспоем Богу: Аллилуиа!

Икос 10

Стена тверда и крепкая ограда буди нам, священномучениче Киприане, с теплою верою и любовью к тебе прибегающим, ограждаеши бо от враг видимых и невидимых, избавлени тобою, прославим тя тако:

Радуйся, духа злобы смирением поведивый;

Радуйся, огнем молитвы стрелы вражия попаливый.

Радуйся, от врагов видимых и невидимых стено и ограждение;

Радуйся, Православная Церкви преславное украшение.

Радуйся, оставленных врач предивное поможение;

Радуйся, прелюбимое скорбящим утешение и увеселение.

Радуйся, священномучениче Киприане, скорый помощник и молитвенник о душах наших!

Кондак 11

Пение непрестанное Пресвятей Троице паче иных принесл еси, священномучениче Киприане, Иже милости ради к падшим грешником благоволи недостойным достойным стати и сочислитися святому стаду. Мы же, благодаряще Бога за таковую милость Его к нам, грешным, зовем Ему: Аллилуиа!

Икос 11

Светозарная свеща был еси, Богомудре, в Церкви Христове, просвещая невестственным светом души верных. Молимся ти, просвети и наша грехми омраченная сердца, во еже пети тебе таковая:

Радуйся, Трисиянным Светом озаренный;

Радуйся, к сонму святых сопричтенный.

Радуйся, яко светом невестственным души верных просвещаеши;

Радуйся, яко заблуждших на путь правый наставляеши.

Радуйся, из рова погибели, яко овча, Спасителем изъятый;

Радуйся, бесов посрамление и человеком радование.

Радуйся, священномученниче Киприане, скорый помощниче и молитвенниче о душах!

Кондак 12

Благодать дана ти от Бога поpirати силу вражию и всякое сатанинское нахождение, победил со еси враги твоя и мученическим

подвигом запечатлел еси веру во Христа. Ныне же, предстоя Престолу Царя славы, молися, Киприане всеблаженне, да избавимся от пленения диавольскаго и воскликнем Богу: Аллилуиа!

Икос 12

Поюще твою верность по Бозе и дивная преславная чудеса, величаем и восхваляем тя, священномучениче Киприане, приял бо еси от Бога таковую благодать. Темже молим тя: егда в час смерти нашея демонская полчища обыдут души наши, яви нам заступление твое, да избавлении тобою, воззовем ти сице:

Радуйся, от находящих вражиих сил скорое защищение;

Радуйся, от всевозможных скорбей и печалей избавление.

Радуйся, Христа до конца возлюбивый;

Радуйся, душу свою за Него положивый.

Радуйся, в крови Агнчей омывшийся;

Радуйся, во дворех Господних вселившийся.

Радуйся, священномучениче Киприане, скорый помощниче и молитвенниче о душах наших!

Кондак 13

О пречудный и преславный угодниче Божий, священномучениче Киприане, скорый помощниче всем к тебе прибегающим, прими от нас, недостойных, хвалебное пение наше. Ей, молим тя, святителю, от многообразных недугов исцели, от враг видимых и невидимых заступи и вечнаго мучения избавитися нам Господа умоли, да с тобою воспоем: Аллилуиа, Аллилуиа, Аллилуиа!

[кондак 13 глаголи трижды. И паки читается 1-й икос и 1-й кондак.]

Молитва

О святой угодниче Божий, священномучениче Киприане, скорый помощниче и молитвенниче о всех к тебе прибегающих! Приими от нас, недостойных, Хваление сие; испроси у Господа Бога в немощах укрепление, в печалех утешение и всем вся полезная в жизни нашей; вознеси ко Господу благомошную твою молитву, да оградит нас от падений греховных, да научит нас

истинному покаянию, да избавит нас от пленения диавольскаго и всякаго действия духов нечистых и укротит обидящих нас. Буди нам крепкий поборник на вся враги видимыя и невидимыя; подаждь нам терпение в искушениях и в час кончины нашей яви нам заступление от истязателей на воздушных мытарствах; да водимии тобою, достигнем Горняго Иерусалима и сподобимся в Небеснем Царствии со всеми святыми славити и воспевати пресвятое имя Отца и Сына и Святаго Духа во веки веков. Аминь.

